

## कोरिन्थीरालाई

### पावलए छीनीकाव परींद ओरायो चिथी

पावलए कोरिन्थ सहरलाव मन्दलीलाई उसंक्ताव चिथी परींद ओरायो छीनी छुत चिथी मनी तोबो सर्द याएक्यो। नो चिथील कोरिन्थीराए यायुं क्याके काना लिद ओसोगोए फरी छीनी आव चिथी सर्द याएक्यो (२ कोरिन्थी २:३-४; ७:८-९)। इन ख्वा ख्वा धुतनी पैज्यावराए पावलए ओपाँलाई सज़िम्द बलेद्याव यापैज्याव (११:४-५; १२:११)। है जैद आव चिथील नोराए जूनी पावलए परमेस्वरनिकाव ओदैव हक सतैद ओरायो सरै:सिउ लिज्या (१०:१-१२:१०)। पावल कोरिन्थीराए याल्योदा ओमाहुद यरूसलेमलाव गरीबराए जूनी भिती दुप्द ओनैरक लिन्या मनी सरै:सिउ लिज्या (९:३-५)।

<sup>1</sup>डा पावल, परमेस्वरए ओखतैनाव येसु ख्रीसए ओसाची, सोनो डस लिज्याव गेभाइ तिमोथीस गिन्ल्योनी कोरिन्थलाव परमेस्वरए ओमन्दलीलाई सोनो अखैया खन्दलाव छैव उमीं भरिरालाई आव चिथी परींद गिन्याचिज्या। <sup>2</sup> परमेस्वर गेबाबु सोनो गेप्रभु येसु ख्रीसनी जेल्योदा नियुं गराँद जेयुं होलाँ जैद ओयाचिरक।

युं होलाँ जैद्याज्याव परमेस्वर

<sup>3</sup>गेप्रभु येसु ख्रीसए ओबाबु परमेस्वरए उमिन बनै ओघ्यो:क। नो गेल्योदा उयुं नाज्याव गेबाबु ज़, गेयुं होलाँ जैद्याज्याव गेपरमेस्वर मनी ज़। <sup>4</sup> नोए गेदुख भरिल गेयुं होलाँ जैद ओयासिज्यावए गे मनी हितावनी ज़ छुतरालाई यादुखराल यायुं होलाँ जैद्याद यायुं सज़े:द्यान्यार ताव परिके। <sup>5</sup> गे ख्रीसए उमिनताव दुखर खा गेदैज्या, हा:ज़ ख्रीसए उमिननी परमेस्वरए गेयुं होलाँ जैद यासिज्याव। <sup>6</sup> गे परमेस्वरए ओपाँ सथैज्यावराए उमिनताव गेदैज्याव दुखर

जेजूनी ज़। जे ननी ज़ अजम्बरी जुनील बान्या येम ब जेदैके। हिताव ज़ नो गेदैज़्याव दुखराल परमेस्वरए गेलाई गेयूर होलाँ जैद ओयासिज़्यावए जेलाई मनी निताव दुखर जेदैक जेयूर सघ्योःद्याद सहिधुन्यार जैचिज़्याव। <sup>7</sup> है जैद गे ननी ज़ जेल्योदा गेयुँ हुबो लिज़्या। कैताराक जे मनी गे गेदैज़्याव मिताव दुखर जेदैक, गे किताव गेदुखराल गेयूर होलाँ ओताज़्याव, जे मनी गेस सिप ज़ जेयूर होलाँ ओताक।

<sup>8</sup>जे डानैँ डामेर, डासकाव लिज़्यावरास एसिया खन्दलाव गेदैव दुखर जे तखेप थैचिके। हो बेलाक नलावर गेखिरी यापसिक गे सही ज़ मासहिधुन्या दुखर दैद, 'अब ते सिन्या ज़ गेताके ब' लिद हार ज़ गेमामिके। <sup>9</sup> नो दुखर अब ते डाथरैके, गे ननी पुलुसून्या काताए आस ज़ ओमाल्योए, गे गेक्याँत माःक, सिउरालाई सोचोइज़्याव परमेस्वरए ओक्याँत ख्यासिद ल्यो परीन्याए जूनी ची नै गेताव ओल्यो। <sup>10</sup> गे निताव सिउल गनिसिउरालाई परमेस्वरए जोगोइद निताव दुखरानी पाथस पलेसिक्यो। आकिनी ब पलेन्या ज़ ले लिद गेयुँ हुबो ज़ लिज़्या। <sup>11</sup> जे मनी गेलाई 'परमेस्वरए पाथस ओरानैवक' लिद पोंखारिद धुरिद्याव ताके। हो ताकिन जेपोंखारिउ परमेस्वरए थैद गेलाई असिक ओयासिज़्याव रँःद कुधुए गेजूनी धन्याबाद चरैःन्या लेर।

पावल कोरिन्थल हुन्या दिलो ओदोव

<sup>12</sup>आव तोबो पाँत गेसुनी च्याँःसिउ ज़ लिज़्या, जेस सोनो छुतरासकाव गेदोव येन भरी छैँव युँनी सतस ज़ गेदोके लिद गेयुँ हुबो ज़ लिज़्या। नो भरी आव मानुवाताव मिँराए बुद्धीनी गेदोव माःक, परमेस्वर गेल्योदा दाइनो ओतावए गेदोव ची। <sup>13</sup> जे मापरिधुन्या सोनो मातीधुन्या पाँर काता ज़ गेमासरे। है जैद डाआस आव ज़, <sup>14</sup> जे गेलाई आःपै चबनै जेमाथरैसिदी ब तछा गेयेन भरी थरैद साचो ज़ ची ओल्यो लिद गेप्रभु येसु उहुन्या छचाम गे जेलाई रँःद गेलाज

ओमाहुज्याव मिताव जे मनी गेलाई रँ:द जेलाज माहुन्यार जेताकिन ताखेहो है डालिज्या।

15-16 डापाँ भरी तीद डालाई ब यायुँ हुप्खेहो ज़ लिद डा माकेदोनियादा बान्या थरैद, ड़ादा जेल्योक हुद जेल्योलाव घ्याँ बान्या डाथरैके। हो ताकिन आनी डाबाक ब, हुनी डाहुक ब यास नेखेप दैसिउ दैन्या डाले है डालिके। फरी ननी यहूदियादा ओल्द डाबाक मनी सघेनार्या है ब डालिके। 17 खाली जेल्योदा हुव डामादैवए उकिला माल्यो मिताव ब जेरँ:नाजूयाखेहो। यातिर वाज़ दोज़्याव मिँराए होक ज़ हैज़ हैज़, होक ज़ मा:क मा:क है यालिज्याव मिताव ब जेथरैनाजूयाखेहो। 18 है जेदाँदी ब ओल परमेस्वर सतस उलिज्याव मिताव डा डापाँ ब जेजूनी आव ताक्या, हो ताक्या है लिन्या स्यासो माले। 19 गे सिलास तिमोथीरास जेलाई परमेस्वरए ओज़ा येसु ख्रीसए ओपाँ गेसथैचिउ भरी 'आव सैं हो सैं' है लिन्या ओमेला ज़ माले, परमेस्वरए ओल्योनिकाव साचो थंरिउ पाँ ज़ याद गेनैचिए। 20 परमेस्वरए भा:किनकाव मिँरालाई ओरायो य़ाका भरी ब ओज़ाए ओक्याँत ओयोव साचो ज़। है जैद गे मनी नो ओपाँलाई ओज़ाए उमिननी 'आमेन' है गेलिज्यावनी परमेस्वरए उमिन सघ्यो:द गेएजूया। 21 जेलाई गेस सिप ज़ छाँतिद ख्रीसए ओक्याँत थंरिउ जैजूयाव मनी ओल परमेस्वरए ज़। 22 फरी नोए गेलाई 'डामीर ज़' लिद छाप झा:द बैनाए जूनी गेयुँल छैंव उपुरूस ब याद नैसिउ।

23 खास ते जेलाई डारिसनी जोगोइन्याए जूनी कोरिन्थल जेल्योक हुन्या डातेन्सिके। धुत डामापाँए, परमेस्वर साची लिज्या। 24 गे जेलाई परमेस्वरए ओपाँत कर गेमालैचिए, काराव ल्यो ताकिन जे ज़ ओपाँत थंरिउर जेलिज्या। गे गेयेन ते जेस तोबो ताद जेयूर होलाँ जैघान्या वाज़ लिज्या।

## २

१ है जैद डा जेल्योड हृद जेयुँर सुहुर्द डायचिज्याव देखा बुरू माबान्या पाथ लिज्या लिन्या डाथरैके। २ डा जेलाई डारिसए जेयुँर सुहुर्द डायचिकिन, नितावल जेकिन डालाई सुए ची डायुँर होलाँ जैद ओयोरिज्याव? ३ है जैद जे डालाई डायुँर होलाँ जैद्याव परिन्याराए 'डाहुक डायुँर माचाव जैद तायारक' लिद आवकिन नो डादाडाव चिथी डासर्क, डायुँर होलाँ ओताकिन जे जेयुँर ब होलाँ तायार लिद डायुँर हुपुद ओल्यो। ४ खाली नो चिथी डापरीज्याव बेलाक माचाव जेयेनत डायुँर घर्द डाप्रिलर रासूद डारसर सैःद डापरीके। नो डापरीव जेलाई जेयुँर केःघान्याए जूनी माःक, बुरू जेलाई खा मया डादाचिज्याव हो घसैरक लिद डापरीव ची।

## माचाव येन दोवलाई रासून्या

५ जेसकाव नो माचाव येन दोवए डा डायुँर माचाव जैद ओयोरिज्याव डालाई वाज्र माःक, जेलाई ते इन जेयुँर ब सुहुर्द्याचिखेहो। ६ जे जाँकोसैए नोलाई जेयो सजा योःके। ७ अब ते जे नोलाई ओगल्तीनी रासूद उयुँर होलाँ जैद्याव ताके, मानी ओसोगोए उयुँर क्यान्या ओछ्यास लिज्या। ८ है जैद जे नो मिँए ओल्योदा फरी जेयुँर ओनाव सतैद्याव ताके लिद जेलाई डाघलैचिज्या। ९ नो डादाडाव चिथील ब डापाँ यादोज्याव सै यामादोज्याव लिद जेलाई जाँचिन्याए जूनी डापरीव। १० नोलाई ओगल्तीनी जेरासूकिन डा मनी डारासूज्या। है जैद जेल्योडावर रासूसिन्या मितावर यालिकिन डा मनी जेजूनी ख्रीसए ओयोरिज्याव हकनी डारारासूज्या। ११ मानी सैतान गेखार्ल पसिद बलेन्या ओछ्यास ब ओल्यो। नितावल गे सैतानए ओचाल मासैधुन्यार ते गेमाले।

## पावलए उयुँर थू ओताव

१२ ख्रीसए ओपाँ सथैन्याए जूनी त्रोआस सहरल डालिज्याक नलावरालाई ख्रीसए ओपाँ सथैन्या प्रभुए बनै चाव मौका

जोरैद्याँक्यो। 13 खाली नल जेल्योनी हुन्या गेभाइ तीतसस गिन्मादैसिउए कै याताव लिद डायुँ थू ताद नलावरास बिदा निद माकेदोनियादा डाबाके।

परमेस्वरए ओपाँ गेक्याँत सतैसिउ

14 हैदी ब परमेस्वरलाई बनै धन्याबाद लिज्या, गेलाई ओयेनत आदा होदा ओजैसिक झेंःस्याराए झेंःस्या ख्रीसलाई एकमन्या गेस नैद्यासिज्याव। है जैद पो पोड गेनी परमेस्वरए ओपाँ चाव सी डरो माँःती राःसिनाज्या। 15 गे ख्रीसए ओपाँ गेरासथैक अजम्बरी जुनील बाज्यावराए खाल तादी ब, नर्गल बाज्यावराए खाल तादी ब, गे परमेस्वरलाई चरैःसिउ सी डरो स्यासोर गेलिज्या। 16 नो नर्गल बाज्यावराए जूनी चिची सी डरो स्यासोर गेलिज्या। फरी नो अजम्बरी जुनील बाज्यावराए जूनी ते चाव सी डरो स्यासोर गेलिज्या। गेनी निताव अचम्बलाव येन माबिरैद दान्यार सु ची गेलिज्यावदा? 17 हैदी ब गे निताव येन चबनै मासुदुमधुन्यार गेतादी ब रूवा रूवाराए यादोज्याव मिताव परमेस्वरए ओपाँ अइज दुलैज्याव मितावर ते गेमाले। गे ते परमेस्वरनी परीसिउ मिताव जैसिद ओल ओडाक छैव युँस ख्रीसए ओसक्तीनी ओपाँ गेरासथैज्या।

### 3

युँताव सर्सिउ पाँ

1 गे निताव गेपाँक, “गेडाक अइज चाव जैसिद यासतैसिज्याव ताखेहो,” है तालिच्यो। गेलाई छुतराए माँःती जेल्योदा गेहुदी ब जेल्योनी गेबादी ब, “आव मिँ इताव ज़, ओयेनर ब इताव ज़ लिज्या,” लिद काता चिथी सर्द याव उपरिज्याव रो? 2 गेयेन सरैःद्याज्याव चिथी ते जेक्याँताव गेदोव येन ज़ लिज्या। नो चिथी भरी गेयुँल ज़ सर्सिउ लिज्या, प्राइँए प्ररिधुन्या ब लिज्या। 3 है जैद जे ज़ गेजूनी गेसाची याज्याव ख्रीसए सर्द ओयासिउ चिथी। नो चिथी

मसीए सर्सिउ ब माःक, लुँए फल्यात खुपिसिउ ब माःक। जींदो परमेस्वरए छैव उपुरूसनी युँत ज़ सर्घाव दोज़्याव।

4आव जेजूनी है डालिज़्याव पाँ भरी ख्रीसनी परमेस्वरए दाद्यासिवा ज़ लिद डायुँ हुबो ज़ लिज़्या। 5 जो येन तादी ब गेनी ताव है लिद गे है गेमालिधुइ, परमेस्वरए वाज़ ओयेन दाधुन्यार जैसिज़्याव। 6 गेलाई साःरो बाचालाव येन दान्या स्यासोर जैज़्याव मनी ओल परमेस्वर ज़। नो बाचा पाखाताव सर्सिउ कानुन मिताव ते माःक, परमेस्वरए छैव उपुरूसनी युँल ज़ ताज़्या। नो पाखाताव सर्सिउ कानुनए सिन्याल झाःज़्याव, छैव पुरूसए ते अजम्बरी जुनी यासिज़्याव।

साःरो बाचाए ओज़गै

7नो डादाडाव सिन्याल झाःज़्याव लुँए फल्याताव खुपिसिउ कानुनए मोसाए ओडाः बनै ज़गै ज़गै ओतावए नो ज़गै छ्यावा पै वाज़ उरहिदी ब इस्राएलीर मोसाए ओडाःत माभाल्सिधुकेर।

8 है जैद नो छैव पुरूसनिकाव साःरो ओदोज़्याव ओयेन झन ज़ ज़गै मगैव कै जैद माताके? 9 निताव सिन्या सजाल झाःज़्याव कानुन उगुन ल्यो ज़गैव ओताकिन, परमेस्वरए उयुँलाव मिताव जैव दोज़्याव साःरो ते झन ज़ उगुन ल्यो ज़गै मगैव ताज़्याखेहो सानी। 10 नो साःरो बनै ज़ ज़गै मगैव ओतावए डादाडाव ज़गैलाई ओज़गै समैदिक्यो। 11 नो ओज़गै मावलाई ओज़गै ल्यो है गेदोकिन, नो ओज़गै मामाज़्यावलाई झन ज़ ओज़गै ल्यो है ल्यो परिके।

12 है जैद नो गेरासथैज़्याव साःरो पाँ गेयुँ हुपद माछेद ज़ गेरासथैज़्या। 13 गे नो मोसाए ओडाःताव ज़गै ओखेमनादी ब, “इस्राएलीराए आव ज़गैत माभाल्सिधुर,” लिद ओडाः कपद ओराएज़्याव मिताव गे ते आव साःरो ज़गैव पाँ कबो मापरिए। 14 नोर यायुँ बनै खाव एकोहोर्यासोर यातावए मोसाए ओडाः

कपद् याएक्यो। आःपै ब कानुनलाव पाँ याप्ररिदी ब नोरालाई कप्सिउ मिताव ज़ लिज़्या। नो पाँ ख्रीसए ओक्याँत याथरैधुकिन वाज़ फैसिज़्या। 15 खाली नोर आःपै मोसाए ओसरो पाँ याप्ररिक काता ज़ मासैन्यार यायुँ कप्सिउ मितावर ज़ लिज़्यार। 16 प्रभुए ल्योदा युँ फकैकिन वाज़ नो युँलाई मासैन्या जैज़्याव कप्सिउ फैसिज़्या। 17 प्रभु ते पुरूस ज़। जोए ओक्याँत प्रभुए उपुरूसए बास दाद नैव, नो मिँलाई प्राइँ फैसिउ लिज़्या। 18 गे ख्रीसए उमिन्तावर गेडाः माकप्सिउ मितावर गेतावए प्रभुए ओज़गै सरैःज़्याव धर्पन मितावर गेलिज़्या। गेप्रभुए ओज़गै खा गेरैःज़्या, हाःज़ गे मनी ओल उपुरूसनी ओगेर सरैःद्याद ओल मिताव ज़ तानाद ज़गैवर गेतानाज़्या।

## 4

युँलाई पलाँ जैज़्याव पाँ

1 है जैद गे परमेस्वरए उयुँ ओगराँवनी निताव येन दान्यार गेतावए जो मितावराल तादी ब गेयुँ माकेःद ज़ गेदोज़्या। 2 गे म्मोसी म्मोसी दान्या लाज हुव येनर गेरास्के। परमेस्वरए ओपाँ गेरासथैक गेयाःत रग रग जैद ससैसिउ पाँ बरेःद गेमारासथैए। बुरू परमेस्वरए ओपाँ किताव उलिज़्याव, हितावनी ज़ सथैद परमेस्वरए ओडाक ज़ गेदोज़्यावए प्राइँ मिँराए साचो पाँ ज़ ओल्यो लिद यायुँल याज़ थरैधुज़्यार। 3 गे गेरासथैज़्याव पाँ ख्वारालाई कप्सिउ मिताव उलिकिन, नो पाँ नर्गलाव येमदा बाज़्यावरालाई वाज़ निताव ताज़्या। 4 आव मानुवा चलैज़्याव सैतानए परमेस्वरए ओपाँ माभैःज़्यावरालाई मुन्दुक्यासोर याजैज़्याव। है जैद ज़ नोर ख्रीसए ओक्याँताव परमेस्वरए ओगेर सरैःद्याज़्याव ज़गै मगैव परमेस्वरए ओपाँ थैन्या ब माथैधुर, रँःन्या ब मारँःधुर। 5 नो गेरासथैज़्याव पाँ गे सघ्योःसिन्याए जूँनी माःक। येसु ख्रीस ज़ गेप्रभु लिद गेरासथैज़्या।

होए उमिननी जेयेन दान्यार जैसिद गेले। 6 किताव स्रिस्तील परमेस्वरए चुम चुमोलाई पलाँ जैक्यो, हिताव ज़ गे गेयुँलाई पाला पलाँ जैद ओल ओपाँनी ज़ सैव परीसिज्याव। ननी ज़ गे ख्रीसए ओक्याँताव सरैःसिउ परमेस्वरए ओज़गैर ओगेर गेथरैज्या।

गमे गेक्याँत परमेस्वरए ओसक्ती

7 ख्रीसए ओपाँ गेक्याँत ओतावए बनै ओएः ल्यो गदान्त गमे जाल झाःसिउ मिताव लिज्या। है जैद परमेस्वरए अचम्बलाव ओयेनर ओसक्तीर इताव गमे गेक्याँत यारैःक, “आव ते यानी माःक, परमेस्वरनी ज़ ओताज्याव ची ओल्यो,” लिद प्राइँए थरैधुज्यार। 8 गे काता दुखरानी गेधलिदी ब तैँ मिताव ते गेमाताए, काताए आस माल्यो मितावर गेतादी ब गेयुँर ब गेमासतेए, 9 मिँर गेखिरी पसिद यासोसिदी ब परमेस्वर गेस ज़ लिज्या लिद काता स्यासो ज़ गेमाडमसिए, पछारिसिउ मितावर गेतादी ब खदम ते गेमाताए। 10 येसु सिउनी ओसोव ओसक्ती गेक्याँत छर्लङ्ग ज़ ओरैःक लिद येसु उसिज्याकाव ओदैव दुखर गे गेक्याँत ब एकमन्या ताव ज़ लिज्या। 11 गे येसुए ओयेनत आव गेक्याँत ज़ गेखिरी पसिद दिनकाव ज़ सैःना यालाँसिज्याव मितावर गेलिदी ब इन ननी ज़ आव सिन्या मान्याल गनिसिउ गेक्याँत येसुनी ताज्याव खर्क ज़ मासिन्या जुनी सतैँसिउ लिज्या। 12 है जैद गे परमेस्वरए ओपाँ सथैज्यावर नो सिन्या मितावल गेपरिदी ब नो जेजूनी ज़ ताज्या। ननी ज़ जे अजम्बरी जुनी जेदैज्या। 13 किताव नो धर्मसास्त्रलाव तोबोए, “डायुँ उहुबोए ज़ डापाँज्या,” है उलिज्याव मिताव गे मनी गेयुँ उहुबोए ज़ गेपाँज्या। 14 गेप्रभु येसुलाई सिउनी सोचोइज्याव परमेस्वरए ज़ जे सोनो गेलाई मनी तछा सोचोइद येसुस सिप ज़ ओड़ाक जैसिरिज्याव लिन्या गेसैँज्या। 15 नो गेक्याँताव ताज्याव



भरी पाईं जेजूनी ज़। ननी ज़ परमेस्वरए उयुँ ओगराँज्याव झन कुधुलाई ज़ ओतानावए परमेस्वरए उगुनर चेतैद उमिन ब ज़गै मगैव ज़ रैःनाज्या।

दुख उहुदी ब स्वर्गताव पो गेदैज्या

16 है जैद गे खर्क ज़ गेयुँर गेमासतेए। पाखाताव गेक्याँ उख्यूदी ब, गेजीलाव गेयुँ ते दिनकाव ज़ साःरो तानाज्या। 17 काराव ल्यो ताकिन आव गेजिउत जाँवा पै गेक्याँत दुख उहुदी ब झन खर्क ज़ माखेमन्या स्वर्गताव ज़गै मगैव पो दैन्याकावर गेताज्या। 18 है जैद गे आव गेजिउत पाखाताव गेमीए गेरैःधुज्यावदा गेयुँ थू गेमाजैए, नो भरी ते तछा यामिन ज़ मान्या ले। गेमीए गेमारैःधुज्यावलाई गेयुँ हुपद गेयुँ थू जैद गेनैज्याव ते खर्क ज़ खेमन्या माले।

## 5

स्वर्गताव साःरो गेक्याँ

1 आव मानुवाताव गेसिप पाल उचिसूज्याव मिताव चिसूद ओखेमदी ब कुइए माताद परमेस्वरनी जैसिउ खर्क ज़ माचिसून्या गेझिम स्वर्गत लिज्या लिद गेयुँ हुबो ज़ लिज्या। 2 आव मानुवाताव गेसिपल गेलेवा भरी स्वर्गताव साःरो क्याँ दैन्याए जूनी गेयुँ थू जैद गेनैज्यावए गे गहनित ज़ गेलिज्या। 3 नो साःरो क्याँ गेदैवत ओक्याँ माल्यो पुरूस स्यासो तान्या गेमाले। 4 आव मानुवाताव दुखरानी गेगहनित्याव नो ओपोर्याप क्याँलाई ख्याव गेपैज्याव ते माःक, स्वर्गताव साःरो क्याँ तान्याए जूनी ची। है जैद आव सिन्यादा बाज्याव गेक्याँलाई खर्क ज़ मासिन्याए ओसमैवक है गेलिज्या। 5 इताव दैन्या ओल परमेस्वरए ज़ जैद नैद्यासिउ। नोए उजूनी डादा ज़ बैना मिताव छैव उपुरूस ब याद नैसिउ।

6 है जैद गेसार् परीद गेयुँर झेंःव ज़ लिज्या। आव मानुवाताव गेक्याँस प्रभुस सिप गेमातादी ब, 7 गेमीए गेमारैःवलाई गेयुँ उहुबोनी ज़ गेदोज्यावए, 8 आव मानुवाताव क्याँस लिज्याव देखा बुरू

प्रभुस सिप लिन्या पाथ लिज्या लिद गेयुँर सज्ञेःद गेदोज्या।  
 9 है जैद गेयुँ इताव ब लिज्या, आव मानुवाल गेलिदी ब, आनी  
 पुलुसद गेबादी ब, प्रभुए उयुँलाव मिताव कातानी तान्या लिद उदिम  
 गेदोज्या। 10 काराव ल्यो ताकिन गे भरी प्राईं तछा ख्रीसए ओड़ाक  
 च्याँःसिद फाल्सिउ परिरिज्या। हो छचाम आव गेजिउताव गेदोव,  
 चाव तादी ब, माचाव तादी ब, सु सु गेदोव गेयेननी ज़ गेजेला  
 गेदेरिज्या।

### मिरालाई परमेस्वरस सखैन्या

11 है जैद गे परमेस्वरनिकाव हुज्याव छचासर गेसैज्यावए नल  
 तापरिरक लिद मिरालाई सम्जैद गेरासथैज्या। नो गेदोज्याव  
 भरी जेजूनी ज़ लिज्या लिन्या ओल परमेस्वरए ज़ सैज्याव।  
 जे मनी जेसैधुकिन ताखेहो है डालिज्या। 12 आव भरी जेड़ाक  
 चाव सतैसिन्याए जूनी माःक, जेलाई गेगुनर चेतैन्या मौका  
 डयाचिज्याव ची। है जैद गे जेजूनी गेदोज्याव येननी जे नो युँनी  
 माताद पाखाताव चलननी यानी स०द सघ्योःसिज्यावरालाई थाम  
 थुम जेराजैधुरिज्या। 13 नो गेपाँत गेलाई दासा बिसाव मिताव  
 जेथरैसिदी ब परमेस्वरए ओमान नैद्यान्याए जूनी ज़ गेदोज्या।  
 फरी गेगहक ल्यो मितावर जेथरैसिदी ब नो जेजूनी ज़ गेदोज्या।  
 14 ख्रीसए मया ओदासिज्यावए गेलाई मनी ओल ओदोव मिताव  
 येनत घलैसिज्याव। काराव ल्यो ताकिन तोबोए प्राईंए जूनी उजिउ  
 झाःद ओयासिउए प्राईं ज़ सिकेर। 15 फरी प्राईंए जूनी उजिउ झाःद  
 ओयासिउए गेलाई वाज़ तान्या भरी रासद गेजूनी उजिउ झाःद  
 सिउनी सैसिज्याव ख्रीसए उजूनी बाँचिउ परिए।

16 है जैद गे पाखाताव रैःन्यानी सुलाई ज़ गेमाराछुतैए। ख्रीसलाई  
 डादा पाखाताव गेबिचारनी गेरैःक ज़िमज़ा ज़ गेथरैज्याव, अबकिन  
 ते छुतनी ज़ गेसरेसज्या। 17 है जैद ख्रीसए ओक्याँत ख्यासिद

लिज्याव मिँ चबनै सा:रो ताज्या। नोए डादाडाव उबिचार भरी ओचलन भरी माद, होए ओपोल उयुँल सा:रो सा:रो बिचारर हुज्या। 18 आव भरी परमेस्वरनी हुव ज़। ओल ज़ ख्रीसनी गेलाई ओलस सखैसिक्यो। गेलाई ओयासिउ येन मनी छुतरालाई परमेस्वरस सखैन्या ज़। 19 है जैद गे मिँरालाई गेरासथैज्याव पाँ आव ज़ — परमेस्वर ख्रीसनी हुद आव मानुवाताव मिँरालाई यापापर चिऊद मायाद ओलस यासखैहुक्यो। नो पाँ सथैन्या फरी ओल परमेस्वरए ज़ गेलाई जैद नैसिउ। 20 है जैद गे मिँरालाई परमेस्वरए ल्योदा खुलन्यात ख्रीसए ओकतवाल्या मितावर गेलिज्या। जेलाई ख्रीसए ल्योनी गेबिन्ती लिज्या — जे परमेस्वरस खैहुचिके। 21 होए गेलाई ख्रीसनी, ओडाक उयुँलाव मिताव गेखत माल्योर जैन्याए जूनी गेदोव पाप भरी कान्त ज़ ओखत माल्यो ख्रीसलाई सुघुर्घासिक्यो।

## 6

1 गे परमेस्वरस सिप येन दाज्यावराए जेलाई है गेदाचिज्या, जेल्योदा परमेस्वरए उयुँ ओगराँव अनाकलाव ताजैच्यो। 2 धर्मसासत्रल ब परमेस्वरए है लिज्या, “डायुँ ओनाव बेलाक ज़ जेपाँ डाथैके, जेचाहित ओताव छचाम ज़ ड़ासघैचिके।” है जैद डा जेलाई है डादाचिज्या, परमेस्वरए उयुँ ओनाव छचाम ब आछिम ज़, जेचाहित ओताव छचाम ब आछिमकिन ज़।

### पावलए उदुस्वर

3 गे परमेस्वरए ओयेन दान्यात ओपाँ:च्या ल्यो कान्त ज़ ताताक लिद सुलाई ज़ यायुँ के:घान्या येनर गेमादोए। 4 बुरू प्राइँ सहिद परमेस्वरए ओसेवा दान्यात सतैद नैसिउ मितावर गेजैसिज्या। है जैद दुखल तादी ब, अखत्याल तादी ब, धो सहिउल तादी ब, 5 गेलाई यारी:सिदी ब, इयालखानाल याझा:सिदी ब, भोरो:सिद

याइयाम्सिदी ब, गेदोज्याव येनलाई मारासूद कैताक मासूयाँद तादी ब, तुर्द तादी ब, धामास ज़ गेदोज्या। <sup>6</sup> है जैद गे बनै छैव युँस, चाव माचाव सैद, माचाव भरी गालूद प्राइँ जूनी ज़ गेदोज्या। परमेस्वरए उपरूसनी प्राइँ ल्योदा गेयुँ थू जैद, <sup>7</sup> परमेस्वरए ओसक्तीनी ओपाँ सतस गेरासथैज्या। वोर्फताव गेकुइत सोनो दाबर्याफताव गेकुइत परमेस्वरए ओयेन दान्यात चाहिज्याव हत्यार भरी रैद गेनै। <sup>8</sup> गे कैताक बीज्यात मनी गेताज्या, कैताक इज्यात मनी गेदैज्या। फरी कैताक चाव मिन ब हुज्या, कैताक माचाव मिन ब हुज्या। गेलाई छुल्यार है यादासिदी ब साचो ज़ गेथोरिज्या। <sup>9</sup> कान्ल ज़ मागनिसिउर यारँ:सिदी ब गनिसिउर ज़ गेलिज्या, सिउ मितावर गेलिदी ब बाँचिउ ज़ गेलिज्या, सजा धूँल यानैसिदी ब गेपोहोन ते माबाए। <sup>10</sup> फरी सोगो धूँल गेलिदी ब रेंव ज़ गेलिज्या, काता ज़ माल्यो मितावर गेलिदी ब प्राइँनी योःवर ज़ गेलिज्या, फरी गरीब मितावर गेतादी ब प्राइँ मिरालाई धनी मितावर गेराजैज्या।

### गेलाई जेयुँर फैद्यासिचिके

<sup>11</sup>अ कोरिन्थलाव गेनै गेमेँर, गेयेन भरी काता ज़ मामाँसिद गेदाँजी ज़ सतैद गयाचिके। <sup>12</sup> खाली गेयुँर फैद गयाचिदी ब जे ते जेयुँर फैव जेमाभै:के। <sup>13</sup> डा जेलाई डाज़ा मितावर जैद डासमूजैचिज्या, गे गेदोज्याव मिताव जे मनी गेलाई जेयुँर फैद्यासिचिके।

### यायुँ माहुपूज्यावरास मानारिसिन्या

<sup>14</sup>जे परमेस्वरलाई यायुँ माहुपूज्यावरास तोबो कुमत तानारिसिच्यो। धर्म सोनो अधर्मनी माखैनी, चुम चुमो सोनो पलाँवनी ब माखैनी। <sup>15</sup> हिताव ज़ फरी ख्रीस सोनो सैताननी ब माखैनी। है जैद परमेस्वरलाई उयुँ हुबो सोनो उयुँ माहुबोनी कातानी निखैरिज्याव? <sup>16</sup> परमेस्वर लिन्या ध्यान झिम सोनो मिँए जैसिउ अडग्यानी ब कातानी निखैरिज्याव? परमेस्वर लिन्या झिम ओललाई उयुँ

हुपूज्यावए उयुँल ज़ ताज़्या। धर्मसास्त्रल ब परमेस्वरए है लिज़्या,  
“डा जेक्याँत बास दाद जेस ज़ आदा होदा डालिरिज़्या।

डा जेपरमेस्वर ज़ तान्या डाले,  
जे डामीर ज़ तान्या जेले।”

17 है जैद परमेस्वरए है लिज़्या,

“नोराए खार्नी पुलुस्द जेबातड लिचिके।

अनाकलाव माचाहिउर काता ज़ जेमाछुकिन,

डा जेलाई डाल्योदा रैद,

18 डा जेबाबु तान्या डाले,

जे डाज़ार तान्या जेले।

आव है लिज़्याव डा माहान परमेस्वर ज़।”

## 7

1 है जैद डानैं डामेर, गे परमेस्वरए निताव ओयाकार गेदैवए गेक्याँ  
गेपुरूसलाई झुथो जैज़्यावरानी चोखोइसिद परमेस्वरए उधुँल लिद  
सतलाव छैव ओयेनदा बाव ताके।

पावलए उयुँ होलाँ ओताव

2 गेलाई जेयुँल लिन्या पो जैद्याव ताके, तावैसिच्यो। गे सुए  
याउपत ज़ मादान्या गेमादोए, सुलाई ब गेमाबले:चिए, सुलाई ब  
गेमाझुकैचिए। 3 आव है डादाचिज़्याव भरी जेलाई जेखतर सतैद  
डायाचिज़्याव ते मा:क। डादाकिन है डालिज़्याव मिताव जे गेस ज़  
गेयुँल सिप ज़ जेलिज़्या। है जैद गे गेसिदी ब, गेलिदी ब, गेयुँनी तँदा  
तान्या जेमाले। 4 जेलाई डायुँ हुपूद डासुनी च्याँ:सिउ ज़ लिज़्या।  
है जैद जो मिताव डादुखराल ब डायुँर होलाँ ताद रेंव ज़ डालिज़्या।  
5 माकेदोनिया गेकेसोत गेदुखराए सन्चस ल्यो गेमादैके। प्राइँनी  
प्राइँनी गेर्च्या सिद पाखाताव गेक्याँ ब उरूमसिज़्याव, गेयुँल

छचास वाज़ उलिज़्याव। 6 हैदी ब यायुँ तेवरालाई यायुँ सझें:द्याज़्याव परमेस्वरए तीतसलाई गेल्योक परींद्याद गेयुँर होलाँ जैद्यासिक्यो। 7 नो होलाँ गेताव अइज़ गेदैसिउनी वाज़ मा:क, जे नोलाई उयुँर होलाँ जैद जेयोनी गे गेयुँ ब होलाँ ओताव ची। जे डालाई मामें:द जेचेतैनाज़्याव, डादा मादान्या जेदोवत सोगो जेदोज़्याव, सोनो डापांत धुरिद्याद डास जेजैसिज़्याव, नो पाँर जेल्योनी हुव तीतसए ओया:नी डाथैक डायुँर झें:द झन ज़ डारेंके।

8 आवकिन नो डादाडाव परींद डाय्याचिउ चिथील जेयेनए जेयुँर जाँ माचाव जैद डाय्याचिउनी, छींनी 'नो यायुँर माचाव जैद्यान्या चिथी डामापरींदी ब तान्या ओल्यो,' है ब डालिके। खाली डापरींव पाथ ज़ ताके, नो जेयुँर माचाव जैद डाय्याचिउ छचावाए जूनी वाज़ ओताव ओल्यो लिन्या डसैके। 9 नो डारेंज़्याव, जेयुँर माचाव जैद डाय्याचिउनी मा:क, जेयुँ माचाव जैद परमेस्वरए ल्योदा जेयुँ जेफकैवनी डारेंज़्याव ची। माचाव जेयेनत जेयुँ माचाव जेजैव परमेस्वरए उयुँलाव मिताव ज़ ताके। नै ओतावए गेल्योनी ब जेलाई कै मै ज़ माताके। 10 परमेस्वरए ल्योनिकाव ताज़्याव सोगोए युँलाई तोद्याद ओल्योदा लाँव दोज़्याव। हा:किन नो सुए ल्योदा ब मागोइसिए। आव मानुवाताव ताज़्याव सोगोए ते सिन्या म्मान्यादा लाँव दोज़्याव। 11 खाली जेलाई ते परमेस्वरए ल्योनिकाव ताज़्याव सोगोए काता ना: परमेस्वरए ल्योदा कलँ लिन्यार ओजैचिउ। नो सोगोए डादाडाव जेयेन भरिनी छेसिन्या ब जैचिक्यो, मादान्या जेदोवत हार मानिउ ब परींचिक्यो, सजानी छे:न्या ब जैचिक्यो, डास खैन्या युँ ब जैद्याचिक्यो, चाव येनत जेर्सा ब पले:द्याचिक्यो, जेलाई सतस दान्या युँ जैद्याचिक्यो। है जैद आव भरिनी जेखत माल्योर जेथ०रिके। 12 नो डादाडाव जेखालाव मादान्या येन दोवए उजूनी डापरींव चिथी होए उजूनी सोनो जेलाई

जेयुँ सुहुर्द ओयाचिउराए जूनी वाज्ज माःक। बुरू परमेस्वरए ओडाक गेल्योदा जेयुँ थू जेज्याव ओरैःक लिद डासर्क। 13 ननी गे गेसंर ब होलाँ ताके।

गेसंर होलाँ ओताव नाः वाज्ज माःक, जेल्योनी उयुँर होलाँ ताद रेंद हुव तीतसस गेदैसिक झन ज़ गेयुँर झेंःद गेसंर होलाँ ताके। 14 डादा तीतस जेल्योड ओमाहुद नोस जेजूनी जेलाई सघ्योःद डापाँव पाँ भरी अनाकलाव माताके। किताव जेलाई गेसथैचिउ परमेस्वरए ओपाँ भरी थंरिउ पाँ ज़ ओताव, हिताव ज़ जेजूनी तीतसलाई है डादोव भरी ब जेक्याँत ज़ थंरिउ ताके। 15 तीतसए जेलाई मामेंःचिउ। जेल्योड उहुक बनै मानस जेनैवए, 'आवर ते परमेस्वरए ओपाँ दान्याकावर ज़ ताद यालिज्याव ओल्यो' लिन्या चेतैद जेलाई झन मया दाचिज्याव। 16 है जैद जे प्राईनी प्राईनी डायुँ हुबोर जेतावए डा रेंव ज़ डालिज्या।

## 8

### कुइ सघ्योःद यान्या

1डानें डामेंर, आव ब सैंच्यो। माकेदोनियालाव मन्दलीराए याक्याँत परमेस्वरए उयुँ ओगराँवनी यादोव येनए जूनी है गेदाचिज्या। 2 नोराए याक्याँत धो सहिउ दुखर हुद उलिज्यावत ब नोराए यायुँ मासतेद रेंद, माथैव मायोःवल लिज्यावत ब परमेस्वरलाई याकुइ सघ्योःद ज़ यान्यार ताकेर। 3 डा जेलाई साचो है डादाचिज्या, नोराए यायुँ स्यानी ज़ याधुवा भरी ज़ दोकेर, रेंःक ते झन मादासिधुन्या मिताव येन ब दोकेर। 4 परमेस्वरए उमिनताव माथैव मायोःवरालाई, 'जुनी ब गेल्योनी गे गेजुँ ब लाँद्याव ज़ ताके' लिद घलैनाकेर। 5 गे है ल्यो गेपैज्यावकिन नोराए झन कोसै ज़ दोकेर। नोराए डादा ज़ प्रभुलाई याजिउ ज़ याचरैःवए परमेस्वरए उयुँलाव मिताव येन ज़ दाद गेलाई ब याजिउ ज़ यासुँपिसिउ मिताव ज़ ताके। 6 जे जेल्योड मनी इताव चाव येनर जे जेक्याँत ब धरैःक

लिद जेल्योडाव चाव येनत थूसिद लिज्याव तीतसलाई पुर्यस घुतुपैयो है गेदोज्या। ७ है जैद जे प्राईं येनत, युं हुपन्यात तादी ब, पाँन्यात तादी ब, सैन्यात तादी ब, नो भरित कलँ लिद गेल्योदा जेयुं थू जेजैज्याव मिताव पो पोडाव माथैव मायोःवरालाई स्योःद गेराएज्याव येनत जे मनी उहिल हाइव ताके।

८आव है डालिज्याव भरी जे मायाद माताए है डादाचिज्याव ते माःक, खाली छुतडावराए माथैव मायोःवराए ल्योदा याजैज्याव युं स्यासो जे जेल्योड ब मालिज्या लिद डासर्ज्याव ची। ९ गेप्रभु येसु ख्रीसए उयुं गेल्योदा ओगराँव जे ब जेसैज्याखेहो। नो डादा प्राईंनी प्राईंनी योःव उलिदी ब गे गेजूनी काता ज़ माल्यो जैसिद हुके। गेलाई प्राईंनी योःवर जैन्याए जूनी गेजूनी नाःल्दिउ येन दाद्यासिक्यो।

१०डा जेसकाव डासल्ला इताव लिज्या, नो डासल्ला जेजूनी ज़ लिज्या। जे आःर्तानी निताव येन दान्या भैःन्यात तादी ब, यान्यात तादी ब, जे ज़ प्राईंरानी डात जेल्यो। ११ अब ते नो जेभैःव येनलाई सयोःव ज़ परिके। किताव डादा दान्या युं जेदोव, हिताव ज़ जेधुवा भरी दाद नो जेपाँ सयोःव ज़ परिके। १२ जे यान्या जेपैकिन जेयुं स्यानी याधुन्या वाज़ दोच्यो। परमेस्वरए नो जेदोधुज्यावकिन कोसै मारैव। १३ आव येन जेलाई दुख याद छुतलाई थाँतस नैन्याए जूनी माःक, प्राईंलाई सम सम जैन्याए जूनी ची। १४ आज्याल जे प्राईंनी योःद धोल पोगोल ताद जेलिज्यावए नो माथैव मायोःवर ब योःवर ताज्यार। फरी नोर छींनी प्राईंनी योःद धोल पोगोल यातावत जे माथैव मायोःवर जेताकिन जे मनी योःवर ज़ तान्या जेले। है जैद प्राईंस सम सम ओताक। १५ हो ताकिन ची धर्मसास्रलाव सर्सिउ पाँ मिताव ज़ तान्या ले। नो सर्सिउ आव ज़, “कुधु दुपोलाई अन्नाकलाव तान्या माले। फरी छ्या ल्योलाई मायोःव तान्या माले।”



तीतसलाई कोरिन्थीराए ल्योदा परींसिउ

16परमेस्वरलाई धन्याबाद लिज्या। किताव जेल्योदा डायुं थू ओताज्याव, हिताव ज़ परमेस्वरए तीतसलाई मनी जेल्योदा उयुं थू जैन्या जैक्यो। 17 नो मिं जेल्योदा गे है गेदोवनी वाज़ उहुज्याव माःक, जेल्योदा उयुं थू जैद उयुं स्यानी ज़ हुज्या। 18 नोस फरी परमेस्वरए ओयेन दान्यात प्राइं मन्दलीराए खार्ल उमिन थासो तोबो गेनै ब गेपरीज्या। 19 नो गेनै, माथैव मायोःवरालाई स्योःद्यान्याए जूनी पो पोडाव मन्दलीराए ल्योनी आव येनत गेस सिप ज़ खतैसिउ लिज्या। गे आव गेदोज्याव येन माथैव मायोःवरालाई कुधु सधैव गेपैज्या लिन्या सरैःद्यान्याए जूनी सोनो परमेस्वरए उमिनलाई सध्योःद्यान्याए जूनी लिज्या। 20 आव पो पोडाव गेस्योःज्यावत कान्त ज़ गेखत तापुलुस्क लिद बनै पाथस प्राइं ड़ाक ज़ गेदोज्या। 21 आव येन परमेस्वरए ओडाक वाज़ माःक, प्राइं मिंराए ड़ाक ब ओमान ल्यो माम्पोसिन्या येन ज़ गेदोज्या।

22नोसि छुत गेभाइ ब जेल्योदा गेपरीज्या। नो मिं ब परमेस्वरए ओयेनत उयुं सध्योःद दोज्याव मिं ज़ गेरैःज्या। आव येनत फरी जेल्योडाव पाँर थैद उयुं हुपूद चह चह ताद हुज्या। 23 तीतस ते डास जेखार्ल सिप येन दोज्याव डानै ज़। नोस हुज्याव गेभाइनी फरी, पो पोनिकाव मन्दलीराए खार्नी परींसिउ, ख्रीसए ओमान नैद्याज्यावनी ज़। 24 है जैद जे नो सोम्लोराए याडाक माथैव मायोःवराए ल्योदा जेयुं उलिज्याव सतैद्याव ताके। हो ताकिन ची आड जेल्योडाव सध्योःद गेपाँव पाँ ब मन्दलीराए साचो थरैन्या लेर।

## 9

जेस्योःज्याव युं कैद ताताक

1परमेस्वरए उमिनतावरालाई चिऊन्या डा है डामादाचिदी ब जे

ज़ जेसैज़्या। <sup>२</sup> जे अखैयालावर आःतानीकिन ज़ थूसिद आव येन दान्यात अझ मनी यूँ जेदोज़्यावए माकेदोनियालावराए डाक जेमिन सघ्योःद ज़ डापाँज़्या। है जैद नोराए जाँकोसै जे जेदोज़्याव रँःद ज़ दोकेर। <sup>३</sup> खाली डा आड सघ्योःद डापाँव पाँ भरी अत्ताकलाव ताताक लिद आव डानैरालाई डाकिन डादा ज़ आव चिथीस जेल्योड डारापरीके। हो ताकिन ची डा नोरालाई है डारादोज़्याव मिताव झाःसिद लिन्या जेले। <sup>४</sup> आलाव माकेदोनियालावर मनी जेल्योदा ड़ास याहुकिन जे नड झाःसिद जेमालिज़्याव गेदैहुचिकिन आडाव जेजूनी डापाँव पाँ ओमाथोरिकिन लाज मोर्नी तान्या गेले, जे ब जेलाज हुन्या ले। <sup>५</sup> है जैद आव डानैरालाई डादा ज़ परीन्या डाजैके। हो ताकिन ची किताव डादा, “स्योःद धोल पोगोल ज़ गेजैरिज़्या,” है जेदाँव मिताव ज़ नोराए गे गेमाहुद ज़ थिक थाक जैन्या लेर। है जैद नो जेस्योःज़्याव भिती यूँ कैद माःक, यूँ स्यानी ज़ ओताक।

कुधु वासोए कुधु ज़ सिम्ज़्याव

<sup>६</sup> आव ब सैच्यो, छचा वासोए छचा ज़ सिम्ज़्याव। कुधु वासोए कुधु ज़ सिम्ज़्याव। <sup>७</sup> है जैद जे मनी आःज़ डाझाःरिज़्या लिद जेयुँल ज़ थरैच्यो। खाली नो करस ब ताताक, यूँ कैद ब ताताक। उयुँ माकैद याज़्याव मिँलाई परमेस्वरए मया दोज़्याव। <sup>८</sup> परमेस्वरए जेल्योदा उयुँ गराँद जेलाई असिक दैवर जैन्या ओल उकुइत ज़ उलिज़्यावए, जेलाई एकम्न्या धोल पोगोल ताद माथैवरालाई याधुन्यार तान्या जेले। <sup>९</sup> आवए उजूनी धर्मसास्त्रल ब इताव सर्सिउ लिज़्या,

“माथैव मायोःवरालाई उयुँ माकैद आदा होदा भाःज़्याव,  
नोए उगुनर रहिद खर्क ज़ मामेंःसिए।”

<sup>१०</sup> वासून्या धुर सोनो ज़्यान्या ज़्यावर जोरैद्याज़्यावए नो

जेस्योःरिज्ञ्यावलाई धुर माँःती सबाःद्याद ननी ज़ धर्मलाव जेयेनर जेगुनर झन ज़ घ्योःन्या ले। 11 जेकुइर सघ्योःद यान्याए जूँनी परमेस्वरए जेलाई योःवर जैचिज्ञ्याव। ननी ज़ फरी नो गेल्योनी जेदोरिज्ञ्याव येनत परमेस्वरलाई धन्याबाद ब चरैःरिज्ञ्यार। 12 है जैद आव जेदोज्ञ्याव येननी परमेस्वरए उमिनताव माथैव मायोःवरालाई ओरासथैज्ञ्याव वाज़ माःक, परमेस्वरलाई ब कुधु ज़ धन्याबाद दैन्या जैज्ञ्याव। 13 नो जेदोव येन ज़ जेसाची तारिज्ञ्या। जे ख्रीसए ओपाँ अनाकलाव माजैद जेकुइ सघ्योःद जेस्योःज्ञ्याव भिती नोराए यादैवत जेदोज्ञ्याव येन साचो थरैद जेजूँनी परमेस्वरए उमिन सघ्योःद्यान्या लेर। 14 जेक्याँताव परमेस्वरए ओअसिक नोराए ल्योड ब ओतावए नोराए जेलाई मामेःद जेजूँनी परमेस्वरलाई पोंखारिउ ज़ नैन्या लेर। 15 गेल्योदा उयुँ गरॉद, गोइँद ब मागोइँसिधुन्या असिकर याज्ञ्याव परमेस्वरलाई बनै धन्याबाद ओताक।

## 10

पावलए ओडैत पाँज्ञ्यावरालाई जवाप ओरायो

1 डा पावलए डाल्योनी जेस तोबो डाबिन्ती लिज्ञ्या, डा ओल ख्रीस मिताव प्राइँत सज़िम्सिद जेस चावनी वाज़ पाँव डापैज्ञ्या। खाली जेनी ख्वा ख्वाराए, “पावल गेस उलिक सुस ज़ मापाँधुन्या छेपोवा स्यासो उलिज्ञ्याव, होड बाद ताकितर हाप हाप ख्यान्या स्यासो चिथीर परीज्ञ्याव,” है लिज्ञ्यार दी लिन्या डाथैज्ञ्या। 2 है जैद जेल्योड डाहुक डारिसए हाप हाप ख्यान्या मिताव ताताक। नो जेल्योडावराए डालाई, “आवए ओयेन परमेस्वरनिकाव हुव माःक, मिँए युँ स्यानी पलेःसिउ येन ची,” है दाज्ञ्यावराए जूँनी ते तखेप डारासिडार्के सैँ है डालिज्ञ्या। 3 आव गेक्याँ मिँनिकाव ओतादी ब मिँए युँ स्यानी गेमाइसिए। 4 गे गेहत्त्यार फरी मिँए

युं स्यानी जैसिउ माःक, परमेस्वरए ओसक्तीनी जैसिउर ची। नो गेहत्यारनी ज़ छे छे डम्सिउ गरर तैःन्या गेले। 5 ननी ज़ गे मिँए युं स्यानी ससैसिउ पाँर सोनो परमेस्वरए ओपाँकिन तँदाडाव स०व पाँर पलत्तैद यामिनर समैद्याद याबुद्धी यागहकरास ज़ ख्रीसए उधूँल गेराझाःजूया। 6 जे परमेस्वरए ओपाँत उघुरिउर जेतावत माउघुरिउ भरिरालाई उघुरिउर जैन्यात झाःसिद लिज्जयावर गेताजूया।

7जे जेड़ाकाव वाज़ रँःन्या माःक। नो जेखालाव, “ख्रीसए उमीर ते गे ची,” है लिज्जयावराए यापाँ साचो ज़ लिन्या याथरैज्याव ताकिन गेलाई मनी या माँःती ख्रीसए उमीर ज़ लिन्या ओथरैसिरक। 8 डा निताव डापाँए प्रभुए ओयाँव हकनी सध्योःसिद डापाँजूयाव मिताव ओरैःदी ब ननी डालाज माहुइ, जेलाई बलेःन्याए जूनी माःक, जेलाई पाथ पारैःन्याए जूनी ची। 9 डासर्जूयाव पाँर ब जेलाई हाप हाप ख्यान्याए जूनी माःक। 10 हैदी ब जेल्योडाव रूवा रूवाराए है लिन्या लेर, “ओचिथीरानी ते बनै छे छे डम्सिउ कर्रा उलिज्जयाव मिताव रँःजूया, खाली गेड़ाक ते त्यात्या तितिव काम मालागिउ मिताव रँःजूया।” 11 निताव पाँजूयावराए आव ब सैद ओनैरक, गे आनी गेचिथील किताव गेपरीजूया, नड हुद गेयेन ब हिताव ज़ तारिजूया।

12खाली ख्रीसए ओपाँ सैःन्यात ‘गेकिन सु ज़ माले’ है लिज्जयावरास ते गे इताव कान्ल ज़ मागनिसिउर नाः ध्योःवरास गेमादाँजिसिधुइ! निताव याक्याँए याक्याँलाई गोइँद बा बा सोगोइसिज्जयावर ते झन काता ज़ मासैःन्यार ताजूयार। 13 गे ते परमेस्वरए ओयासिउ गोइँकिन आगल्या ससैद ब गेमापाँए, सध्योःसिद ब गेमापाँए। बुरू परमेस्वरए ओयासिउ गोइँ भरिल जे ब जेलिजूया। 14 नो जेल्योडाव गेदोव येन परमेस्वरए ओयासिउ गोइँकिन आगल्या माले। जेल्योडाव ख्रीसए ओपाँ सथैवर प्राइँरानी डातावर गे ज़

गेल्यो। 15 जेल्योडाव गेदोव येन परमेस्वरए ओगोईकिन डाकसै बाद छुतराए याथालिउ पाँलाई तुपैद गेसध्योःसिज्याव ते माःक। खाली नो जेल्योडाव गेदोव येनरानी जे जेरुँर झन ज़ हुपूद जेल्योनी नो पाँर प्राईदा रासिद परमेस्वरए ओयासिउ गोई ब जेनी झन ज़ ओघ्योःक लिद जेल्योड आस गेदोज्या। 16 निताव ओताकिन ची जेकिन होदाडाव पो भरिड ब ख्रीसए ओपाँ सथैव दैन्या गेले। ननी ज़ छुतराए याथालिउलाई गे गेतुपैव मिताव ब तान्या माले, परमेस्वरए ओयासिउ गोईकिन सध्योःसिन्या ब तान्या गेमाले। 17 है जैद नो धर्मसास्त्रलाव सर्सिउ मिताव, “जो सध्योःसिउ पैज्याव, प्रभुनी वाज़ ओसध्योःसिक।” 18 ओलनी केर्घे जैसिज्याव मिँलाई प्रभुए माभैःए, ओल प्रभुए ओथरैव वाज़ ताज्या।

## 11

पावल सोनो परमेस्वरए ओपाँत घेप्पा जैसिज्यावर

1 यार्ती माल्योराए यापाँज्याव मिताव डापाँर तखेप सहिद्याव ताके। जेसहिया ज़ लिद डायुँ हुबो ज़ लिज्या। 2 किताव जेल्योदा परमेस्वरए उर्युँ थू ओताज्याव, डा डायुँ मनी हिताव ज़ ताज्या। तोबो लुज़ालाई जिम्जात ज़ निद यानैज्याव मिताव डा मनी जेलाई ख्रीसए उमिनत थामिद छैँवर जैद ख्रीसए तछा लाँन्यार जैद डानैचिए। 3 खाली जेल्योड तोबो पाँत डायुँ माहुबो लिज्या। किताव छुल्या घुलए प्राईरानी उसंकताव मेंमा हब्बालाई उझुकैव, हिताव ज़ जे मनी कसाराक ख्रीसए ओसतत मालिद बलेसूद तँदा बार्या लिद डायुँ थू ताद छेँव ज़ डालिज्या। 4 जेल्योड गेकिन छुतर हुद गे गेसथैचिउ येसुकिन छुत येसुए उज्जीनी यासथैचिक, सोनो जे जेदैव छैँव पुरूसकिन छुत पुरूस मितावर यारैःक, सोनो परमेस्वरए ओपाँकिन छुत पाँर यासथैचिक नो भरी बेहार ज़ तीद

बनै जेजम्कैज्ञया! 5 खाली नो जेल्योडाव घेप्पा जैसिद परमेस्वरए ओपाँत सैन्या जैसिज्ञयावराकिन डा ज़िमज़ा ते डामालिखेहो। 6 पाँन्यात चावस डामापाँधुदी ब सैन्यात ते कान्ल ज़ कम्ती डामाले। निताव डायेन जेल्योड प्राइंनी ज़ सतेंद नैद डयाचिए।

7 जेल्योड डा सज़िमसिद जेलाई सघ्योःन्याए जूंनी जेल्योनी काता ज़ मारैद परमेस्वरए ओपाँ जेलाई अइज़ डासथैचिउए मादान्या डादोव ते मालिखेहो। 8 हो बेलाक जेलाई पाथ पारैन्याए जूंनी छुत मन्दलीराए यासघैनाक नोरालाई डारालुतिउ मिताव ज़ ताके। 9 डा जेल्योड डालिज्ञयाव बेलाक डालाई माथैव मायोःवल जेलाई सुलाई ज़ डामाघचैचिए। डालाई नो माथैव मायोःवल माकेदोनियानी हुव गेनै गेमेराए ज़ सयोःद्याँकेर। है जैद जेलाई नो बेलाक ब डामाघचैचिए, आकिन ब घचैन्या डामाले। 10 स्त्रीसए साचो ओपाँ डास उलिज्ञयावए है डादाचिज्ञ्या, अखैया भरिल सुए ज़ आव सघ्योःसिद डापाँवलाई वैधुन्या मालेर। 11 नो जेल्योनी काता ज़ डामारैज्ञयाव जेलाई मया मादाद ते माःक, जेल्योदा डायुँ थू डाजैज्ञयाव ओल परमेस्वरए ज़ सैज्ञयाव। 12 डादाकिन डादोज्ञयाव मिताव मारासुद दाव ज़ नैन्या डाले। हो ताकिन यानी सघ्योःसिद गे मिताव जैसिद लुइसिहुज्ञयावराए यायेम ओलनी ज़ सूइसिद थाम थुम तान्या लेर। 13 नोर अनाकल ज़ स्त्रीसए ओसाची मितावर जैसिद मिँरालाई झुकैद परमेस्वरए ओपाँ बलेःद पैज्ञयावर ची। 14 आव पाँत अचम्ब ताताच्यो। सैतानए मनी मिँरालाई झुकैन्याए जूंनी कैताक ज़गैवलाव परमेस्वरए ओचाकर्या मिताव ब जैसिज्ञ्या। 15 है जैद नोए ओबाँदार मनी मिँरालाई झुकैन्याए जूंनी परमेस्वरए ओयेन दाज्ञयाव मितावर याजैसिक धर्मी मितावर रैःज्ञ्यार नो काता अचम्बलाव पाँ ज़ माःक। नोराए यासजा यादोव येननी ज़ दैरिज्ञ्यार।

पावल तखेप फदवाल्या जैसिद ओपाँव

16 डा डादा है डादाचिज्याव मिताव, इताव पाँर डासम्जैचिक त्यात्या तितिव उर्ती माल्यो पाँज्याव मिताव जेमाजैनाकिन ताखेहो है डालिज्या। खाली जो मिताव जेजैनादी ब डालाई ते थिक ज़, जेलाई सम्जैन्याए जूनी आथ पाला तखेप सघ्योःसिद डापाँरिज्या। 17 आव जेस डापाँरिज्याव पाँ प्रभुनिकाव हुव ते माःक, तोबो उर्ती माल्योए सघ्योःसिद ओपाँज्याव मिताव ज़ डापाँरिज्या। 18 जेल्योडाव पाँज्यावर नितावर यातावए डा ब जेस नितावनी ज़ डापाँरिज्या। 19 खाली जे निताव सैन्या जैसिज्यावराए मासैन्याराए यापाँ सहिद जेराएधुज्याव मिताव आव उर्ती माल्यो डापाँ ब सहिद जेयाँया ज़ है डालिज्या! 20 जे बनै सहिधुन्यार जेलिज्या। जेलाई माचाहिउ चलन धूँल किद यानैचिज्याव ब जेसहिज्या, धुतैद याज्युचिज्याव ब जेसहिज्या, सघ्योःसिद जेडैताव याजैसिक ब जेसहिज्या, मुत्का यासकैचिक ब जेसहिज्या! 21 डा निताव येनराल नोराकिन काता ज़ मासैन्या मिताव डातावए जेडाक भाल्सिउ डाडाःर ब माले।

है जैद डा ब तखेप नोराए मिताव फदवाल्या जैसिद उर्ती माल्यो डापाँज्या। 22 नोर, “गे ते हिबू जातलावर ज़,” है लिज्यार, डा मनी हैज़ डालिज्या। नोर, “गे ते इस्राएलीर,” है लिज्यार, डा ब इस्राएली ज़। नोर फरी, “गे ते अब्राहामए ओथोलावर,” है लिज्यार, डा ब होलाव ज़। 23 नोर स्त्रीसए ओयेन दोज्यावर रो? डा ते झन होराकिन ब डादोज्या। आव उर्ती माल्यो डापाँ जेसहिधुया ज़ है डालिज्या। नोराए काता येन ची दाद नैरदा, नोराकिन डा ते कुधु येन ज़ दाद डानै। नोराकिन झ्यालखानाल ब कुधु पाला डालिके, कुधु पाला मागनिसिधुन्या रीःसी न्निन्या ब डाताके, एकतार सिन्या मिताव छचासल ब डालिज्या। 24 यहूदीराए याकुइनी

उनान्चालीस खेप पाँच पाला डारीःसिके। <sup>25</sup> सोंखेप झुइए प्रोनाकेर, तखेप लुँए ब झेःनाकेर। रीलाव जहाजल डाबाक ब जहाजर सोंखेप फुद तखेप तला तरी भरी रील ज़ डालिके। <sup>26</sup> डा एकमून्या येमत डाबाक कैताक भलए ओछ्यास ब ताके, कैताक चोरराए छ्यास ब ताके। कैताक हाप हाप ख्याजूयाव डाजातलावराए खार्ल ब डापरिके, कैताक छुत जातलाव मचिजूयावराए खार्ल ब डापरिके। नो डापरिजूयाव छ्यास कैताक सहरल ब ताजूया, कैताक साइँसुइँवक ब ताजूया, कैताक समुन्द्रल ब ताजूया, कैताक ख्रीसए उमिनताव मिताव जैसिजूयावरास ब ताजूया। <sup>27</sup> कैताक फरी बनै नाल कूयाव च्याःसिउ येनर डासहिजूया। कुधु पाला रीर ओव मादैद करे ज़ लिद बिनु क्वा जूयूँःवए भुम भुम गूद डाससँजूया। <sup>28</sup> नोकिन झन पो पोडाव मन्दलीराए जूनी डायुँ थू ताद बनै घ्योःव सोगो डादोजूया। <sup>29</sup> नोर कैताराक परमेस्वरए उमिनत माथंरिधुद याधलिकिन नो डा डाधलिउ मिताव ज़ ताजूया। कैताराक फरी नोर मादान्या येनराल यापरिक डायुँर स्यासे तेद वाल्सिवा वाल्सिवा डाताजूया।

<sup>30</sup> डा फदवाल्या जैसिन्या ताकिन डादैव दुखराए डालाई यासजिमनावनी वाज़ डाजैसिखेहो। <sup>31</sup> आव पाँत धुत डामापाँए, प्रभु येसुए ओबाबु गेपरमेस्वरए ज़ सैजूयाव। नोलाई खर्क ज़ माखेमून्या धन्याकाव ओताक। <sup>32</sup> डा दमस्कसल डालिजूयाक ब नलाव राजा अरितसए उधूँलाव हाकिमए डालाई क्योःन्याए जूनी सहरनी पुलुसून्या येम येमक पाल्यार यानैक्यो। <sup>33</sup> नो बेलोक डानैराए डालाई तोबो भेल झाःद नो सहरलाई बारिसिउ भानार्ताव इयालनी मेल झरैनाकेर। है जैद नो हाकिमए उकुइनी डापुलुस्के।

## 12

पावलए ओरँःव अचम्बलाव पाँर

1 डा इताव सध्योःसिद पाँन्या माचाहिउ येन मिताव उलिदी ब आथ



पाला ते जेजूनी ओचाहित ल्यो ज़ तारिज़्या। है जैद प्रभुए डाडाक सरैःद ओयाँव अचम्बलाव पाँर तोबो नेब्लो है डादाचिज़्या।  
 2 स्त्रीसलाई उयुँ हुबो तोबो मिँ चौध बर्स डादा प्राइरानी झेःव पो स्वर्गत परमेस्वरनी ज़ छींसिद बाके। खाली ओक्याँस ओबाव सैँ ओक्याँनी पुलुसुद ओबाव ओताव डा डामासैँए, परमेस्वरए वाज़ सैँज़्याव।  
 3-4 नल सुए खामल ज़ माल्यो अचम्बलाव पाँर थैक्यो। नो स्वर्गत बाव ओक्याँस ओबाव सैँ उपुरुस ओबाव ओताव डा डामासैँए, परमेस्वरए वाज़ सैँज़्याव।  
 5 नो बाव मिँए उजूनी वाज़ सध्योःद डापाँज़्या, डानी ते डामासध्योःसिए। डा डजूनी डापाँज़्याव ते ज़िमज़ा डारैःवनी वाज़ डापाँज़्या।  
 6 सध्योःसिद डापाँदी ब नो पाँ थोरिउ ओतावए उर्ती माल्यो डामाथोरिए। खाली मिँराए डाक्याँताव याथैज़्याव यारैःज़्यावकिन चाःसिउ ताताक लिद आगल्या डामापाँए।

### परमेस्वरए ओसक्तीर पावलए ओक्याँत रैःज़्या

7नो डादा डारैःव पाँर बनै अचम्बलावर यातावए, डालाई नो पाँरानी तासध्योःसिक लिद परमेस्वरए डाक्याँलाई ख्योःन्या तोबो जु मिताव याद नैनाव। ननी डालाई सैतानए ओचाकर्याए दिनकाव ज़ ओख्योःनाज़्याव मिताव लिज़्या।  
 8 आव दुख डाक्याँनी उपुलुस्क लिद प्रभुलाई सोंखेप बिन्ती डाचरैःके।  
 9 खाली प्रभुए डालाई, “डायुँ नल्योदा ग़ाल्द डासधैनिज़्याव नँस धोल पोगोल ज़ ताज़्या। डा डासक्ती मिँराए यामादोधुज़्यावल ज़ रैःज़्या,” है दाँक्यो। है जैद स्त्रीसए ओसक्ती डाक्याँत ज़ ओरैःक लिद डानी डामादोधुज़्याव पाँलाई सध्योःन्यात डालाज माहुद खुसीस डापाँज़्या।  
 10 है जैद डा स्त्रीसए ओयेनत डार्सा ओमालिदी ब, डालाई बीज़्यात याजैनादी ब, डाखिरी पसिद दुखर यायाँदी ब, उस्किउ मादैन्या मितावराल डापरिदी ब नो भरिल रेंव ज़ डालिज़्या। निताव डार्सा माल्योल ज़

झन परमेस्वरए ओसक्तीर डाक्याँत ज़ रैःज़्या।

काराव जेयुँल सिल्द जेनैनाज़्याव?

11 डा निताव फदवाल्या डाजैसिउ जे जेघलैनावनी ज़ सानी। खास नो डापाँव पाँर थरैद डादोव येन सघ्योःद्याव परिन्यार ते जे जेल्यो। डा कान्ल ज़ मागनिसिउ मिताव डालिदी ब नो स०द सघ्योःसिद ख्रीसए ओहक दैव जैसिज़्यावराकिन डा कान्त ज़ ज़िमज़ा डामाले। 12 डा जेल्योड डालिज़्याक ब ख्रीसए साचो ओसाचीए सतैव परिन्या अचम्बलाव येनर, अचम्बलाव सरेसर बनै धामास ज़ डादोके। 13 जे पो पोडाव मन्दलीराकिन कातार छ्या जेदैव मिताव जेडम्सिज़्याव? सै जेल्योनी काता ज़ मारैद डादोवनी जेयुँ उहुर्ज़्याव? हिताव ताकिन काराव डालाई जेयुँल सिल्द जेनैनाज़्याव?

14 आथ पालाकाव हुव डापैज़्यावस जेल्योड हुन्या सोखेप तारिके। आथ पाला ब कान्त ज़ घचैन्या डामाले। डा जेस लिज़्याव जेसम्पतीर डाखिमहुज़्याव माःक, जेलाई वाज़ डाखिमहुचिज़्याव ची। याज़ाराए याबाबु याआमाराए जूनी मादुप्, याबाबु याआमाराए ची याज़ाराए जूनी दुप्। 15 है जैद डा मनी जेजूनी डाजिउए मया मादाद डास लिज़्याव भरी खेम्द तादी ब डाक्याँलाई सख्यूद तादी ब रेंद ज़ डादोज़्या। जेल्योदा डायुँ थू ताद नाःकाव डादोवनी जे डागुन छ्या ज़ जेरैःज़्याव रो? 16 हैज़ जेलिकिनदा हैज़ लिज़्याचिके, डा दासर जेल्योनी खर्क ज़ कातार रैद डामाघचैचिए जे ज़ जेसैज़्या। सै बाथो जैसिद तँनी झुकैद डाहाइचिज़्याव जेथरैनाज़्याव? 17 नो जेल्योदा डारापरींवर जेलाई हाइद ज़्यान्याए जूनी डारापरींव ते माःक। 18 डा तीतसलाई ओनैस जेल्योदा डानिपरींक मनी जेलाई कातार हाइद माज़्युखिनिहो। तीतसस गिनयुँ तोबो ज़ लिज़्या, तोबो युँनी ज़ गिन्दोज़्या।

जेल्योड डाहुक सुस ज़ डारिस चोव ताताक

19 डानैं डामेरं, आव गेपाँर जे गेपाहा झाःद जेयासिउनी झेंःसिउ गेपैँज्याव ते माःक, आव पाँर परमेस्वरए ओड़ाक ख्रीसस लिद जेलाई पाथ पारैन्याए जूनी गेपाँज्याव ची। 20 खाली डा जेल्योड डाहुक डायुँलाव मितावर जेमाताए सैं लिद जाँ डाछे-ज्या। हिताव ताकिन ते डा मनी जेयुँलाव मिताव डामाताए सैं। जेखाल इंसिन्या, अर्काए ओक्याँत मी तून्या, रिस चोन्या, क्यौँलाई तान्या वाज खिमन्या, अर्काए उछीनी पाँद उमिन बलेःद्यान्या, स०द सघ्योःसिन्या, सुस ज़ माखैव तान्या, नितावर जेले सैं लिन्या डाडम्सिज़्या। 21 जेल्योड डाहुक परमेस्वरए ओड़ाक जेलाई रैंःद लाज मोर्नो डाताए सैं लिन्या छ्यास ब लिज्या। नो डादाकिनकाव जेल्योडाव फुरी येन दाद पातर्या पातर्नी जैसिज़्यावर, जोत ब यायुँ मानैधुद मादान्या येन दावर परमेस्वरए ल्योदा यायुँर माफकैँद हिताव ज़ यालिकिन डासोगोए भुतुक तान्या डाले।

### 13

आथ पाला बाँखी नैन्या डामाले

1 डा जेल्योड डाहुव आथ पालाकावस सोखेप ताज्या। है जैद आव धर्मसास्त्रलाव पाँ ब सैंद नैच्यो, “काता गोहाईराल नेब्लो सोम्लोए यासाची ओखैकिन नो पाँ ज़ थ०रिउ ताज्या।” 2 आथ पाला जेल्योड माहुद ज़ डादाडाव डाहुकाव है डादाचिउ मिताव फरी ब है डादाचिज्या, डा जेल्योक डाहुक नो डादाकिनकाव पाप दाज्यावर सोनो छीनी दोवरालाई ब हिताव ज़ यालिकिन नोरालाई बाँखी नैन्या डामाले। 3 हो ताकिन ची डाक्याँताव जेखिमज्याव मिताव ख्रीसए ओसक्तीलाव सरेसर रैंःन्या जेले। नो बेलाक ज़ डास लिद पाँज्याव ख्रीस जेल्योदा ओर्सा माल्यो मिताव माताद, बनै ओर्सा ल्यो तान्या ले। 4 ख्रीस क्रुसत तङ्गैसिद ओर्सा माल्यो

मिताव ताद उसिदी ब, ओसोवत परमेस्वरए ओसक्तीर दैद बाँचिउ ज़ लिज़्या। है जैद गे ख्रीसस लिज़्यावर मनी गेसा गेमिन माल्यो मितावर गेलिदी ब, गे ख्रीसस सिप ज़ परमेस्वरए ओसक्तीर दैद जेल्योदा गेहक गेचलैरिज़्या।

जे जेल सुधरैसिउ ताके

5जे परमेस्वरए ओपाँत जेलिज़्याव सैं जेमालिज़्याव जे ज़ जाँचिसिउ ताके। निताव जेजाँचिसिक येसु ख्रीस जेस उलिज़्याव सैंव परिके। जेमासैकिन परमेस्वरए ओपाँतावर जेमाताए। 6 गेलाई ते 'परमेस्वरए ओपाँत काम लागिउर ज़' जेथरैसिज़्याखेहो है गेलिज़्या। 7 जेल्योड माचाव येन काता ज़ तापुलुस्क लिद परमेस्वरलाई पोंखारिउ ज़ गेनैज़्या। जेल्योडाव गेयेन ओफाबिउ घरँ:रक लिद गेपोंखारिउ ते मा:क, गे सुए याडा: यामील गेमाहुदी ब चाव येन घदोरक लिद ची। 8 गे जो मिताव गेरै:दी ब परमेस्वरए साचो ओपाँलाई गेमाबले-धुइ, किताव लिज़्या हितावनी ज़ गेदोज़्या। 9 गे सुए याडा: यामील गेमाहुदी ब जे परमेस्वरए ओपाँत बनै थ०रिउर चावर जेताकिन गे खुसी ज़ गेलिज़्या। या याल ज़ उसुधरैसिरक लिद जेजूनी पोंखारिउ ज़ गेनैज़्या। 10 आव पाँर डा डामाहुद डादा ज़ सर्द डापरींज़्या। हो ताकिन ची जेल्योड डाहुक प्रभुए ओयाँव हकरानी जेल्योदा कर्ग जैसिउ परिन्या माले है डालिज़्या। नो प्रभुए ओयाँव हकर बलेन्याए जूनी मा:क, बनैन्याए जूनी ची।

जेरो दान्या पाँर

11डानैँ डामेर, प्राइरानी छीनीकाव डापाँ आव ज़ — बलेसोर थिक थाक जैद जेयुँर होलाँ जैच्यो। जे भरी प्राइँ तयुँ जैद खैद लिच्यो। हो ताकिन ची गेल्योदा उयुँ थू जैद गेयुँर होलाँ जैद्याज़्याव परमेस्वर जेस ज़ तान्या ले। 12 जे जेल मयास\* जेरो दासिच्यो। 13 आडाव

\* 13:12 13:12 रोम १६:१६ चिऊन्या।

परमेस्वरए छैंव उमींराए मनी जेरो है दाचिज़यार।

14जे जेल्योदा गेप्रभु येसु ख्रीसए उयुँ ओगराँक, परमेस्वरए उयुँ जेल्योदा ओताक, गेलाई तोबो जैज़याव छैंव पुरूस ब जेस ओताक।

**साःरो बाचा**

Kham, Western Parbate: साःरो बाचा (New Testament)

copyright © 2015 Wycliffe Bible Translators, Inc.

Language: (Kham, Western Parbate)

Contributor: Wycliffe Bible Translators, Inc.

Promotional text filled to upload to DBL.

All rights reserved.

2020-11-18

---

PDF generated using Haiola and XeLaTeX on 30 Dec 2021 from source files dated 30

Nov 2021

258cde44-1703-5da4-948d-94a8b2e9b9dd